

Remitido

Pabien na nos lider incansable Nelson Orlando Oduber

Diaranzon 7 di februari 2001 ta cumpli un aña mas di bida, nos lider sr. Nelson Orlando Oduber, un persona cu desde cu el a drenta politica como hoben dia 4 di maart 1975 a sabi di haci cosnan grandi pa nos pais. Dia 25 di April 1975 el a aparece pa promer vez ariba lista como candidato no. 23 y a sa di haya sosten considerable di e pueblo votador. Como cu desde el a termina su estudio na 1973 na Hulanda y a regresa su isla natal, e tabata yuda partido M.E.P. Den tur preparacionnan ariba tereno di nos structura estatal, el a ser acerca na 1975 pa subi lista di e prestigioso partido Movimient3o Electoral di Pueblo.

E tempo ey no ta cuestion, manera hopi ta haci awor di negocia un number ariba lista, pero a firma blanco e lista di candidatonan demostrando cu su confianza ta den e partido y a bin pa yuda e partido. Desde 1977 el a ser eligi den tur eleccionnan cu a tuma lugar cu votonan di preferencia, sea den eleccion pa Eilandsraad como Staten di Antiyas. Na dos ocasion, partido a haci un apelacion ariba dj'e pa e bira Ministro den e Gobierno Antiyano, pero el a prefera di keda diputado den gobierno insular pa por a traha directamente pa su isla.

Como diputado el a desplega cosnan grandi pa nos pueblo, manera nos himno, bandera, ortografia, proyecto

di compania Arubano di bus, esta Arubus N.V.; proyecto pa un container-haven, hunto cu un fondo di pensioen pa e trahadornan di haf, biblioteca publico, un edificio nobo pa Domeinbeheer, Hotelvakschool Bushiri, un plan pa infraestructura di mas cu 100 ha. cu yama "Plan Sasaki", coordinador pa prepara Status Aparte, compra di Elmar, percura pa W.E.B. bira un N.V., unda miyones a ser inverti den su renobacion y cumplimiento di equipo nobo y hopi otro mas proyectonan importante pa nos pais.

Desde 31 di December 1985, Nel Oduber a bira lider interino di nos partido y dia 8 di maart 1987 a ser eligi como lider di M.E.P., den cual puesto el a ser re-eligi na 1991, 1995 y 2000 como e unico lider politico desde 1986 Cu a ser eligi den un Congreso y pa medio di un forma democratico. Recientemente Nel a cumpli dia 4 di maart 2000, 25 aña cu el a drenta den politica, unda den Club Caiquetio yena cu mas cu 4000 hende a celebra esaki.

Practicamente Nel ta dirigi M.E.P. desde 31 di December 1985, un periodo di casi 16 aña caba, unda cu despues di un accidente nos lider den feliz memoria Betico Croes a keda desde 31 di December 1985 den coma te 26 di November 1986, unda lamentablemente el a fayece na Hulanda. Desde cu Nel a

tuma e partido M.E.P. over di cual nos tabata tin na 1985 8 asiento den Parlamento, el a percura pa M.E.P. logra 10 asiento na 1989, unda pa un paar di voto nos lo a logra 11 asiento. Eleccionnan cu a sigui na 1993, 1994 y 1997, Nel como lider a percura pa M.E.P. nunca a baha bao di 9 asiento, lo cual ta un logro hopi grandi mes, pasobra na Antiyas y Aruba tur partido cu nan lider a fayece a bay atras den voto, unda tin di nan casi a bay na 0 asiento y tin ta na 0 asiento! Nel a percura pa tene e nucleo di M.E.P. hunto, apesar cu tur Mepista sa cu tabata un tarea hopi dificil.

Nos lider Nel Oduber a fungi 3 periodo den Bestuurscollege di nos pais como diputado, unda el a ser encarga cu un gran cantidad di carteranan importante, manera nos structura estatal. Desde 1986 a ocupa e funcion di miembro di Parlamento como oposicion, unda a guia e oposicion te na februari 1989. Dia 5 di Januari 1989 Nel como lider a sorprend'e hopi hende guiando M.E.P. na un victoria grandi di nada menos cu 10 asiento den Parlamento, un total di casi 17.000 voto. Esaki a conduci cu el a bira e di dos ministro presidente di e pais Aruba, despues di Status Aparte, unda el a guia desde 1986 e unico gobierno cu a bay e periodo di 4 aña completo.

Den eleccion di 8 di januari 1993, Nel a bolbe guia M.E.P. na 9 asiento, unda el a bolbe bira Ministro Presidente pa di dos vez. Ta conoci cu den cualkier gobernacion Nel ta e diferencia, su experiencia, conocimiento politico y dinamismo ta garantia pa exito. Honesto y humilde. Logro nan hopi grandi di Nel ta dia el a firma dia 13 di juli 1990 cu Ministro Presidente sr. Ruud Lubbers y ministro di Justicia, tambe encarga cu e.o. Asuntonan Antiyano/Arubano sr. Ernst Hirsch Ballin, pa saca e fecha di independencia di nos pais di 1996 for di Statuut, un fecha cu a ser imponi ariba nos. Nos a mantene e derecho di autodeterminacion si, esta e derecho di bira independiente dia e pueblo ta desea esaki, mediante un referendum y cu sosten di 2/3 parti di miembronan di Parlamento.

Un otro logro importante ta dia cu el a firma dia 19 di October 1989 cu e compania Coastal e re-apertura di e refineria, un inversion cu a resulta total di mas cu 2.5 biyon dollar. Esaki a percura pa diversifica nos economia den refineria cu tin awe 2 delay coker cu ta inversionnan hopi grandi cu ta casi garantiza un estadia permanente na Aruba. Asina nos por keda menciona hopi mas cosnan grandi cu el a logra.

Nel nos lider ta casa cu Glenda y tin 3 yiu homber, esta Glenison, Danguillaume y Nelson Jr. Nos di M.E.P. tin

gran admiracion pa tur lo cual e ta haciendo pa nos partido y nos ta desea nos lider hopi mas alia di bida. Cu Dios Tata Todopoderoso dun'e hopi forza y salud den bida pa e por sirbi nos pais y keda guia nos prestigioso partido M.E.P. pa hopi aña mas. Cu bo pasa un feliz dia di bo cumpleaños den compania di bo sernan keri y esnan cu ta stimabo di berdad. Pabien di curazon y biba M.E.P. y Aruba.

Movimiento Electoral di Pueblo.